

Nunatsinni sulisoqarniarnikkut sulisussarsiortarnermi aammalu sulisunik atatitsiinnarnissamut pissutsinik Naalakkersuisut qulaajaanermik suliaqartitsinissaannik Inatsisartut aalajangiiffigisassaattut siunnersuut. Qulaajaalluni suliap pingaartumik sammissavai inuiaqatigiittut ingerlatsinermi pingaarutillit suliffeqarfiit, soorlu peqqinnissaqarfik, atuarfeqarfiit, inunnik isumaginnittoqarfiit il.il., aamma ilanngullugu saqqummiunneqassapput suut suliniutit ingerlanneqarnersut innuttaasut suliffeqarnermut attaveqarniarnermikkut annaasaqarnissamut aarlerinaatillit pillugit. Qulaajaalluni suliaqarneq kingusinnerpaamik naammassineqarsimalluni Inatsisartunut saqqummiunneqassaaq Inatsisartut 2016-mi ukiakkut ataatsimiinneranni.
(Inatsisartunut ilaasortat Steen Lyngø aamma Siverth K. Heilmann, Atassut)

Akissuteqaat

(Inuussutissarsiortnermut, Suliffeqarnermut, Niuernermit Nunanullu Allanut Naalakkersuisoq)

Siullermeerneqarnera

Qujanaq siunnersuutissinnut Steen Lyngø - Siverth K. Heilmann-lu. Tikkuarparsi unammilligassaq nunatsinni sammineqarnerusariaqartoq, tassalu sulisussanik ujarlertarneq aalajaatsumillu sulisorisanik tigumminiinnartarneq.

Uanga ilisimasakka naapertorlugit sulisorisat taarseraannerujussuat pillugu annerusumik nassuiaasiortnermik suliaqartoqarnikuunngilaq, pisortat suliffeqarfiutaanni namminersortuniluunniit, - taarseraannerullu annertuup annikinnerulernissaanut qanoq iliorsinnaagaluarnerisugut eqqarsaatigalugu. Kisianni tassa ersarilluinnarpoq sulisorisat taarseraannerujussuat annertuunik aningaasartuuteqarnermik kinguneqartarpoq, - aningaasannorlugit isigigaani, aammali ilisimasanik annertuunik annaasaqartarnermik, suliffeqarfiutitsinnilu naammassisaqarsinnaassutsip annikinneruneranik kinguneqarluni.

Naalakkersuisut takusinnaasaat naapertorlugit ajornartorsiut arlalinnik sammiveqarpoq. Siullertullu apequtaavoq sulinissamut atugassarititaasut naammattumik pilerinassuseqarnersut. Assersuutigalugulu kiffartuussinermi suliffissanut aammalu aalisakkerivinnut sulisussanik pissarsiniartarnitsigut ajornartorsiuteqaraangatta ajornartorsitit nikerartumik suliffeqartarnermut attuumassuteqarsinnaasarput, akissarialunnerusinnaapput, suliffimmilu sunnuteqarsinnaaneq annikippallaarsinnaalluni.

Immikkut ilinniagaqarfiusuni ilissi eqqartukkassinni ajornartorsiutit allaanerusinnaapput: Peqqinnissaqarfimmi suliffik ulapaarfiuvoq, najugaqavissunullu tulluurtunik ilinniagalinnik ikippallaartunik sulisussaqaarluni, kisiannili meeqqat atuarfianni isumaginnittoqarfimmilu sulisuusunut inuiaqatigiinni inukitsuni suliaat kikkunnit tamanit isiginiarneqarnerusartut, tassanilu pingaaruteqaarluni suliani ilinniarsimasani isumasioqatissaqartarnissaq

ilinniaqqissinnaanerlu, unammilligassanut piareersimasinnaajumalluni kisimiinnanilu, suliassani fagitigut unammilligassartaqartuni.

Suliffissanut qarasaasialerinnermut – IT-mut – attuumassutilinni nunatsinni unammilligassaajuaannarpoq tassani suliffissat annertoorujussuarmik nunarsuarmioqatigiit suliffigimmatigit. Taamaattumik sulisussat pigiinnarsinnaajumallugit akissarsiat saniatigut aamma allanik neqeroorutissaqartariaqarpugut. Erqumaffigiuaannartariaqarparpullu sulisussanik naammattunik ilinniartitsinissarput.

Taamaattumik suliassami uani unammilligassatta aningaasartuutitalu misissuataarnissaat, aammalu suliffeqarfinni sulisorisat tigummiinnarsinnaajumallugit suliniutit qanoq ittuuneri nalilersortissallugit eqqarsaat pitsaasuvoq. Immaqalu nalilersuineq taanna aqutigalugu sakkussarsinnaasugut iluatsittumik sulisussarsiorarnissamut, sulisorisanut aningaasartuutit annikinnerusinnaasut, siviunerusumillu sulisup atorfimminiittalernissaa aqutissiuunneqarsinnaasoq.

Naalackersuisut isumaat naapertorlugu pissusissamisuussaaq qulaajaaneq 2016-ip aasaata tungaanut ingerlatissallugu, 2016-ip ukiaani Inatsisartunut saqqummiussinermik kinguneqartumik. Suliami peqataatinneqassapput Aningaasaqarnermut Sulisoqarnermullu Aqutsisoqarfik, aamma Ilaqutariinnermut, Naligiissitaanermut Isumaginninnermullu Naalackersuisoqarfimmi Anguniakkanut Ineriartortitsinermullu Immikkoortortaq.

Naalackersuisut oqaatigineqartut tungavigalugit inassutigissavaat siunnersuut akuersissutigineqassasoq.